

CELEBRACIÓN EN OS COTOS

25-26 de xaneiro do 2025

III ORDINARIO C



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,

E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

♪ nº 3 *Unha xuntanza de amor*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai e do Fillo e do Espírito Santo.

No evanxeo de hoxe atopamos a Xesús achegándose á súa vila, e como un veciño máis vai compartir a fe en comunidade. El participa, érguese para facer a lectura, e proclama unhas palabras da profecía de Isaías. Palabras das que o mesmo Xesús dirá “hoxe cúmprese diante de vós esta Palabra”.

Nós hoxe estamos facendo o mesmo. Como veciños achegámonos ao fogar da igrexa para escoitar a Palabra de Deus e poñérmola en práctica. Non podemos quedar soamente na escoita dos feitos de Xesús ou das súas palabras, senón que temos que facer dela a guía que nos ensine a camiñar coma cristiáns.

Deixemos que os nosos feitos mostren a acción da Palabra de Deus aos que comparten connosco a vida de cada día. Entón poderemos dicir ben alto que hoxe en nós tamén se cumpre a Palabra de Deus.

ACTO PENITENCIAL

Celebrante: *Deus conta con nós, pero a nosa vida non sempre está á altura do que El quere e espera de nós. É por iso polo que queremos comezar pedindo perdón porque queremos facelo mellor:*

Monitor/a

➤ Porque moitas veces miramos para outro lado e facémonos xordos cando a túa Palabra nos resulta dura e esixente. Señor, ten misericordia de nós

➤ Porque moitas veces non somos exemplo nin proclamamos contigo a salvación de todos. Cristo, ten misericordia de nós

➤ Porque moitas veces non nos sentimos urxidos a atender aos que hoxe viven necesitados de Boa Nova e de signos de Liberación. Señor, ten misericordia de nós

Celebrante: *Deus, Pai agarimoso, ten piedade de nós, dos que teñen un lugar na nosa vida, de todos os que sofren e non atopan solucións. A todos nos conceda o perdón dos pecados e nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Pensemos cales son as nosas mellores obras?*

(silenzo)

Celebrante:

Deus todopoderoso e eterno,
dirixe a nosa vida conforme ao teu amor,
para que, no nome do teu Fillo,
poidamos dar froito abundante de boas obras.
Pedímoscho por Cristo, que vive e reina
por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Dispoñémonos agora a escoitar a Palabra de Deus que hoxe nos di que todos somos necesarios, todas as mans son boas, para, entre todos formarmos o corpo de Cristo. No evanxeo, vemos a Xesús participar na celebración da Palabra na sinagoga do seu pobo. Con El a Palabra cúmprese, e con nós? Escoitémola para vivila.*

Leccionario I C páx 172 **1 Cor 12, 12-14.27** LECTURA

LECTURA DA CARTA DE PAULO AOS CORINTIOS

Irmáns e irmás:

Igual que o corpo, sendo un, ten moitos membros e todos estes membros, con seren moitos, non fan máis dun corpo: así tamén Cristo. Porque a todos nos bautizaron

nun único Espírito, para formarmos un único corpo: tanto xudeus coma gregos, tanto escravos coma libres. E a todos se nos deu a beber un único Espírito.

Pois ben, o corpo non está formado por un único membro senón por moitos.

Ben, pois vós sodes corpo de Cristo e tamén membros, cada un pola súa parte.

Palabra do Señor

SALMO 🎵 50 *Na tardiña baixa da vida*

(en pé) *Lec I C páx 173* Lc 1, 1-4; 4, 14-21 *EVANXEO*

PROCLAMACIÓN DO SANTO EVANXEO SEGUNDO LUCAS

Posto que moitos emprenderon a tarefa de narrar axeitadamente os feitos ocorridos entre nós, tal como nolos transmitiron desde o principio as testemuñas oculares e mailos predicadores da palabra, decidín eu tamén, despois de me informar con tino desde as orixes, escribirchos ordenadamente para ti, ilustre Teófilo, a fin de que coñezas ben a firmeza das ensinanzas nas que te instruíron.

Naquel tempo, coa forza do Espírito Santo, Xesús voltou a Galilea, e a súa sona estendeuse por toda a redonda. Ensinaba nas sinagogas, e todo o mundo dicía moito ben del.

Chegou a Nazaret, onde se criara, e o sábado entrou, como estaba afeito, na sinagoga. Ergueuse para facer a lectura, e déronlle o libro do profeta Isaías. Abriuno e atopou unha pasaxe que dicía:

O Espírito do Señor está sobre min
porque El foi quen me unxiu
para proclamarlle a Boa Nova aos pobres.
Mandoume para lles anunciar
a liberación aos secuestrados
e a vista aos cegos,
para lles dar liberdade aos asoballados,
e proclamar o ano de graza do Señor.

Pechando o libro, devolveullo ao encargado, e sentou. Todos os ollos da sinagoga enteira estaban fixos nel. Logo empezoulles a dicir:

- Hoxe cúmprese diante de vós esta pasaxe da Escritura.

Palabra do Señor

(sentad@s) gardamos uns instantes de silencio para acoller a palabra no corazón



No Evanxeo de hoxe Xesús remata dicindo “hoxe cúmprese diante de vós esta Escritura”.

Tamén nós hoxe o dicimos, porque é certo que con nós se cumpre este Evanxeo.

Hoxe cúmprese esta Escritura cos nenos e as familias que se esforzan pola catequese. Primeiro ensinando a rezar e vivindo a fe cos fillos dende a casa, e logo implicándose na catequese parroquial adaptada a todas as idades dende os sete aos quince anos.

Hoxe cúmprese esta Escritura con nós, cos que nos reunimos cada semana para rezar cos veciños e veciñas. Xuntos queremos ser comunidade e ben sabemos que todos somos necesarios e importantes.

Hoxe cúmprese esta Escritura cando non calamos, e non calamos a traxedia dos refuxiados, e non calamos os abusos da igrexa, e non calamos a violencia de xénero, e non calamos o egoísmo dos muíños eólicos, e non calamos porque se calamos non cumprimos.

Hoxe cúmprese esta Escritura en cada esforzo que poñemos para un mellor coidado da natureza. Cumprimos cando reducimos o consumo, cumprimos cando reutilizamos as cousas, e cumprimos cando reciclamos.

Hoxe cúmprese esta Escritura cando soñamos e sementamos paz, a pesares de todos os abusóns que se creen que poden pasar por enriba de todos e de todo como sucede en Palestina.

Hoxe cúmprese esta Escritura, e queremos seguila cumprindo cada un dos nosos días. Vale a pena.

(en pé) PROFESIÓN DA FE

Celebrante: *Neste encontro parroquial damos resposta da nosa fe, do noso querer ser solidarios, do noso querer dar unha man a todas as persoas que sofren e están desesperadas. Proclamemos:*

♪ Creo, Señor, pero aumenta a miña fe

Monitor/a:

***Credes en Deus, Pai e Nai,
que ama a todos sen diferenza e que nos convida a facer
un mundo máis solidario e de irmáns?***

Creo, Señor, pero aumenta a miña fe

***Credes en Xesús,
que nos convida a seguir os seus pasos, e que nos quiere
dando unha man transformando a soidade en compañía, a
tristura en ledicia, o desprezo en acollida?***

Creo, Señor, pero aumenta a miña fe

***Credes no Espírito Santo,
que nos alenta a colaborar, construíndo unha sociedade
que axude a vivir en paz e en igualdade?***

Creo, Señor, pero aumenta a miña fe

***Credes na igrexa
comunidade que necesita das nosas mans e dos nosos
compromisos para un mellor coidado da terra e da
natureza?***

Creo, Señor, pero aumenta a miña fe

ORACIÓN UNIVERSAL

Celebrante: *No camiñar da vida atopamos a Xesús á nosa beira. El aléntanos para sermos e darmos exemplo do evanxeo, por iso rezamos hoxe dicindo:*

SEÑOR, QUEREMOS FACER EVANXEO

Monitor/a:

- ✓ Con toda a igrexa queremos dar unha man para mellorar a vida dos homes e mulleres que sofren a falta de paz. Oremos
- ✓ Con todos os pobos e os refuxiados que sofren violencia, pobreza e asoballamento, para que poidan escoitar a Boa Nova da Salvación. Oremos
- ✓ Con todos os veciños e veciñas da nosa comunidade de Os Cotos, para que sexamos cumpridores da Palabra, e non nos contentemos con escoitala. Oremos
- ✓ Con todas as parroquias para que abramos os ollos ao bo facer de Deus, porque El quérenos á súa beira sendo e dando exemplo de fe. Oremos
- ✓ Con todas as persoas que o fan ben nas responsabilidades dos gobernos, para que sigan alentando na tolerancia e no respecto. Oremos

Celebrante: *Señor, dásnos o valor de facer nosa a túa misión, dásnos a coraxe de tomar partido por quen espera a Boa Nova do Evanxeo vivido. Ti que vives e reinas por sempre eternamente. Amén*

3.- OS SIGNOS DA COMUNIÓN CON DEUS E COA COMUNIDADE

NOSO PAI

Celebrante: *A oración do Noso Pai ten sentido cando a dicimos dándonos conta que hoxe Deus nos fala e que a súa Palabra se cumpre nas nosas vidas se deixamos que se faga a súa vontade. Rezamos confiados*

NOSO PAI ...



SIGNO DA PAZ

Celebrante: *Cristo foi enviado para proclamar o “tempo da graza”, un novo tempo, unha nova oportunidade. A nosa celebración compartida anuncia o mesmo. Que non nos canse dar unha man, porque as nosas tamén son necesarias. E dende logo valen a pena cando fan ben como agora facemos compartindo un xesto de paz.*

♪ nº 36 Fagamos a paz irmáns

COMUÑÓN

Celebrante: *Xesús na sinagoga de Nazaret di: “hoxe cúmprese esta Escritura”.*

Que a nosa participación aquí sexa un compromiso real por cumprir a súa Palabra nas nosas vidas. Aquí escoitamos o que nos propón Xesús co seu exemplo, para nós facelo cada día.

Aquí compartimos o que Xesús nos dá, e ditosos nós convidados a este pan do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 **nº 55** **No colo da miña nai**

4.- AVISOS E DESPEDIDA

ORACIÓN FINAL

Celebrante:

Señor,
ti aléntasnos coa túa Palabra
e aliméntasnos co pan da vida,
fai que sintamos sempre a alegría
de participar dos teus dons.

Pedímoscho a Ti que vives e reinas con nós
por sempre eternamente. Amén

A Palabra de Deus é espírito e vida.

Cada vez que a escoitamos é preciso saber o que o Señor nos quiere comunicar nela para poder facela nosa.

Soamente así tamén nós poderemos ser espírito e vida para os outros, os que precisan de nós.

Avísase das misas (ver folla do mes)

***Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén***

🎵 **nº 56** **Ide e pregoad**

Podémonos ir en paz. Amén

XESÚS É A PALABRA DE VIVA DE DEUS



HOXE SOMOS A PALABRA VIVA DE DEUS